

李文忠公奏稿

李文忠公奏稿

卷之二十三目錄

橋道開用民田摺

同治十三年正月二十日

津餉截留關稅片

同治十三年正月二十日

湖廣水師欠餉請廣學額摺

同治十三年正月二十八日

覆陳葉伯英補缺片

同治十三年三月十六日

慶祺木價報銷片

同治十三年三月十六日

豫省加價撥借生息摺

同治十三年四月初八日

蘆鹽酌加賣價摺

同治十三年四月初八日

蘆課奏銷展緩摺

同治十三年四月二十七日

海防支應報銷摺

同治十三年四月二十七日

旗租撥協奉賑摺

同治十三年五月初六日

機器局動用經費摺

同治十三年五月初六日

祕魯商約定議摺

同治十三年五月十三日

張家口糧臺請部餉摺

同治十三年五月二十三日

派隊航海防臺摺

同治十三年六月初十日

彭楚漢交卸赴閩片

同治十三年六月初十日

夾板印封仍由驛遞片

同治十三年六月初十日

匪徒仍就地懲辦摺

同治十三年六月十六日

楊鼎勳耐祀會祠片

同治十三年六月十六日

李光昭報效木植結訟摺

同治十三年七月初三日

海防請催川餉摺

同治十三年七月二十一日

淮軍雜支請照核銷片

同治十三年七月二十一日

開濬陳家溝減河摺

同治十三年七月二十四日

部研價脚分別捐補摺

同治十三年七月二十四日

出借練餉制錢片

同治十三年七月二十四日

輪船獲盜請獎摺

同治十三年七月二十四日

李文忠公奏稿卷二十三

全集一之二十三

桐城吳汝綸編錄

橋道開用民田摺

同治十三年正月二十日

奏爲本屆春差改道處所開用民田擬請量加調劑恭摺仰祈

聖鑒事竊本年二月

皇上恭奉

兩宮皇太后祇謁

西陵應修橋梁道路先經臣派員察勘因年久失修又疊被大水

從前

御道及尖營地盤或已沖成河溝變爲水窪復經委員會同嚮導處章京等查看如房山縣古陽窪等處應改道繞越及改墊尖營地盤皆係開用民田查歷屆恭辦道段兩旁二三里界內旗民地

畝糧租均蒙

恩旨酌定分數蠲免有案蓋大道雖屬官道而隨差人馬眾多踐踏兩旁地畝尙須優予體恤況改道係開用民田修墊正副各道及地盤則與兩旁二三里界內偶被踐踏者情形較重其已種麥苗皆應毀棄空費工本及差竣而地已碾研堅實尤須開創墾復方能播種秋禾小民種地爲生麥收既無可望秋收又難預必連年災歉之後籽種牛力木極拮据今重費經營更形苦累前奉寄諭慮及災區民力難支令臣酌度情形據實具奏該地戶等既有苦情自應奏請量加調劑以廣

皇仁而示區別據司道具詳前來相應仰懇

天恩所有改修道段地盤開用旗民地畝應徵同治十三年糧租全行蠲免仍責成該管州縣逐細查丈頃畝數目再行酌給籽種

由藩司籌款核發作正開銷至

御道兩旁二三里界內地畝應蠲分數糧租仍照向章屆期候

旨遵行理合恭摺具陳伏乞

皇上聖鑒訓示謹

奏

津餉截留關稅片

同治十三年正月二十日

再臣前因天津海防軍餉不敷查照歷辦成案請將同治十二年津海關未解京餉留用旋經戶部議覆未准臣維海疆防務至重勢不得不就地籌餉現在津口防兵已成定額尙慮不敷分布兵無可減卽餉無可節運出防綏遠城直字營馬隊計之歲需銀四十萬兩除撥長蘆復價十萬兩其餘則以津海關六成洋稅洋藥釐捐爲大宗若稅釐暢旺尙可敷衍近因災歉頻仍收數短絀挪湊支應竭蹶萬分查歷年以來皆將津海關奉撥京餉留作海防餉需非不思京餉緊要實以天津拱衛

京師較別處通商口岸關繫尤重旣須綢繆門戶卽難兼籌並濟故雖蘆商疲累酌請減收復價而歲撥海防之十萬兩不敢絲毫議減戶部以臣前請減收復價摺內有如不添練增費無須另籌



撥款之語今請留京餉謂爲不合殊不知減收復價係聲明專減  
保定練餉撥款並非減撥津防餉需津餉本指關稅爲大宗歷經  
留用亦非始自今日況該關徵稅若干撥解餉需若干按結按期  
報部有案其中盈絀查核自明所有十二年分關稅不足防餉其  
奉撥京餉委係無可撥解據該關道陳欽具詳前來合再籲懇  
天恩俯准免解救部查照謹

奏

湖廣水師欠餉請廣學額摺

同治十三年正月二十八日

奏爲湖廣督標水師兩營報效欠餉擬請加廣學額以昭激勸仰

祈

聖鑒事竊查湖廣督標水師兩營向隨臣勦捻山糧臺發餉據原帶水師親兵營記名提督督署湖南鎮軍鎮總兵鄧萬林親兵水師新副營記名提督李洪壽稟稱該兩營截至同治八年底止歷年積欠餉銀各哨勇情殷報效請加廣長沙縣學額等情當經飭據金陵報銷總局司道等查稱湖廣督標新副親兵兩營截至八年底止除先後補發外實欠發餉銀二萬八百九十七兩零四分該兩營勇丁籍隸湖南長沙縣者居多核計報效欠餉銀數酌議加廣學額詳請具

奏等情前來臣查部定章程嗣後外省捐輸只准請加一次文武

學額概不准請加永遠文武學額其廣一次文武學額改爲一屬  
捐銀一萬兩者准廣一次文武學額各一名等因通行遵照在案  
今該兩營官弁勇丁共體時艱情殷報效實屬深明大義應懇  
天恩敕部查議准以二萬兩加廣湖南長沙縣一次文武學額各  
二名以昭激勸而符定章除飭將報效欠餉實數另開清單咨部  
查核外理合恭摺具

奏伏乞

皇上聖鑒敕部核覆施行謹

奏

覆陳葉伯英補缺片

同治十三年三月十六日

再准吏部咨同治十三年二月十四日奉

上諭御史張觀準奏各省候補人員壅滯應行疏通一摺著吏部議奏其所稱直隸道員葉伯英鑽謀得缺等語著李鴻章查明據實覆奏毋稍徇隱欽此知照前來遵查葉伯英由戶部候補主事咸豐十年經前辦河南團練大臣毛昶熙奏調軍營旋捐知府分發甘肅在豫辦團期匪出力保升道員仍留甘肅歸候補班前充補用又改指直隸同治四年離營七年引

見到省經前督臣曾國藩與臣先後委令會辦練餉局營務處事宜均措置裕如十一年九月清河道陳鼎出缺遴委該員署理查清河道一缺例應揀選諳練河務者請補緣該道有綜理河工之責如正定深冀保定各屬之滹沱河潞龍河順天保定連界之大

清河及上游各水匯歸之西淀源遠派繁皆關農田水利軍興以來廢弛已久近年雨水極大百病叢生苟且因循者率多視爲難辦忽置不講該員於委署後親往逐一履勘博采羣議或加築隄壩以防潰沖或添開減河以洩水勢所籌悉合機宜精力尤耐勞苦當以該員爲實精詳往來河干無官場偷惰習氣且應歸候補班前充補用之員照例請補清河道缺仍責成次第督辦隄河各工迄今尙未竣事旋經吏部核議覆奏准補奉

旨依議在案竊維屬員鑽謀差缺最爲官場惡習臣夙所深惡凡關地方利害雖一差之微必損其才具察其品行從未敢輕率委任況清河道爲省會要缺亟須得人助理豈容僥倖營求致有貽誤葉伯英本係合例應補無所用其鑽謀若才無足取例不准補雖鑽謀亦必不能得臣當日請補摺內兼爲擇才起見吏部議覆

摺內則稱與定例相符是其非鑽謀得缺確有明證臣何敢稍有  
徇隱相應遵

旨據實覆陳伏乞

聖鑒謹附片具

奏

慶祺木價報銷片

同治十三年三月十六日

再咸豐八年十二月原任直隸督臣宗室慶祺任內正值

萬年吉地興工欽奉

上諭將天津海口礮臺餘廢木料查明丈尺件數咨報工部並辦理工程處如果合式委員徑解等因當經慶祺查明造冊咨報堪以應用慶祺旋即出缺由前任長蘆鹽政松齡派員於九年五月解送

平安峪工程處呈交共計八千七百三十六根准工程處照數驗收咨覆有案查前項木植本因天津海口礮臺采買所需木價係慶祺自行籌墊其解交工程處之八千七百三十六根合計墊價實銀四萬二千七兩六錢除由海口糧臺撥銀一萬六千七百二十九兩二錢六分八釐實墊銀二萬五千二百八十八兩三錢

三分二釐原應查照采買

萬年吉地木植奏案於天津關稅長蘆鹽課並多倫廳木稅項下歸款因鹽關支絀無款可籌而多倫廳木稅短收且須解部遂致歷久懸宕總未給領慶祺之子現任倉場侍郎延煦曾請於應領前項墊款內捐銀二萬兩作為軍餉呈經原任

欽差大臣科爾沁親王僧格林沁因軍務倥傯未及奏辦今延煦以該侍郎世受

國恩現值庫款竭蹶何敢於先人已墊之款復請歸還請將應領捐贖銀五千二百八十八兩三錢三分二釐歸入前捐銀二萬兩案內一併作為捐輸以清積贖並聲明不敢仰邀議敘等因咨會前來臣維慶祺所墊木價除撥還外尚應領實銀二萬五千餘兩為數甚鉅延煦以庫款竭蹶先後聲請全數捐輸實屬仰體時艱



克成其父未竟之志近來懸關文細尤甚應如所請辦理惟捐款  
給獎本係定例該侍郎既不邀敘應請移獎其親族子弟山戶部  
就近咨旗查取履歷核給以昭激勸理合附片具陳伏乞  
聖鑒訓示謹

奏

豫省加價撥借生息摺

同治十三年四月初八日

奏為長蘆奉撥

東陵永濟籌備兩庫生息銀兩無款可籌請以豫省蘆鹽加價量  
為借濟恭摺仰祈

聖鑒事竊臣欽奉同治十三年三月初八日

寄諭載遷等奏請撥款生息以備支放一摺著照所請由長蘆鹽  
務項下撥借銀五萬兩以一半解交載遷等發商生息分交永濟  
籌備兩庫備用以一半由長蘆運司就近發商生息歸還原款等  
因欽此遵即督飭運司設法妥籌茲據該運司成孚詳稱長蘆徵  
收各項皆關解應支本無閒款商情疲累已久完納不能如期  
近復連歲被災灘坵沖沒成本加重屢據通綱商人請借帑金以  
資周轉因庫儲未裕隨時駁飭而商累實深應徵課款嚴勒比追

總難足數歷年額撥京奉各餉解者尙無項歸還應解者又急如星火運庫支絀萬分實無餘款可以撥借且從前京外各衙門借給蘆商本銀早已虧缺應交利息責令現商攤賠拖欠尙多亦難再令領本生息惟

陵需支絀奉

旨撥借敢不竭力勉籌查有豫省蘆鹽加價一款每年應解部銀五萬兩擬請移緩就急俟本年秋季運收有成數先撥一半銀二萬五千兩解交

東陵承辦事務衙門自行發商生息仍於長蘆應解戶部項下劃除等情前來臣查長蘆庫項竭蹶實無餘款可籌商情疲乏亦難生息歸款惟奉

旨撥借

東陵生息銀二萬五千兩載遷等既擬發商取息以供支用尙非有借無還該運司擬於本年解部加價項下酌量撥借將來卽由該承辦事務衙門俟生息事竣仍如數籌解戶部歸款庶此項不致無著而要需得稍接濟一轉移間兩有裨益除咨部查照立案外理合恭摺覆陳伏乞

皇上聖鑒訓示謹  
奏

蘆鹽酌加賣價摺

同治十三年四月初八日

奏為蘆綱連年災歉運本加重傷耗過多請酌加滙耗賣價藉以補苴課本恭摺仰祈

聖鑒事竊查長蘆商情疲累應加調劑事宜業經前督臣曾國藩與臣先後陳奏部臣因關繫課款未能一律議准迄今運務仍無起色推其致累之由自道光二十八年清查以後將舊商虧空課帑責令現商按引捐補繼以軍興十餘年地方多故商累已深近年連遭水患鹽失收成運本加重兼以新曬嫩鹽傷耗賠折累益增累課運不能及時皆有岌岌自危之勢據道綱商人瀝訴苦情懇請拯救臣體察屬實惟據請減引等項仍屬有礙課款勢難准行均已隨時駁斥復督同運司成孚通籌酌議必期有補於商無損於公不病於民茲據該司擬請酌加滙耗賣價具詳前來臣

查商運引鹽例有應加滿耗從前灘鹽豐收甲年存坵乙年築運中隔一年之久且經夏令出滿後築包運岸傷耗之數與例加不相上下自運被水災灘無老滿坵無積鹽皆隨曬隨築隨運質嫩易消殊多傷耗較前數年每包須多耗一成顆粒皆關課本多耗一斤即多一斤虧折商力實不能支今擬除津武口岸並永平七局均近灘坵不計外其餘直隸各引岸並豫省蘆鹽引岸請每包於舊定斤兩之外酌加二十斤此次專為新鹽質嫩沿途傷耗太多藉資彌補應免加課而於原定課額則毫無出入亦尙不至佔礙銷路又查引鹽賣價尙有一定錢數原按課本核計既便民問買食而商人得價完課亦有餘利嗣雖綱情日累尙未至十分虧賄近則鹽收短絀不敷配運須赴沿海設法收買鹽價既重其車船運腳繩席等項亦多耗費計築運熟鹽一包須從前兩三包之

價且銀價逐年增漲商人買鹽得錢必須易銀交課賠累更多而  
賣價仍照原定錢數不特無利可圖實已大虧課本凡商買賣  
總以成本重輕爲長落鹽商成本愈重利息愈微無怪人人裹足  
從前商力疲乏歷經准加賣價有案今擬除津武口岸並永平七  
屬向不隨眾加價又豫省蘆鹽前已加價不計外其餘直隸各岸  
引鹽每斤酌加賣價制錢二文計民間每人日食鹽三錢以月計  
之每人僅多費制錢一文零尙不至病民仍認真緝私以杜充斥  
以上二條係爲現在時勢所值不得不量予變通相應仰懇

天恩俯准照辦以保課本而恤商艱俟奉

旨之下月初一日起一律照加暫以五年爲限屆時悉心察勘如  
鹽收豐稔銀價平減商力稍舒卽分別奏請停止所有酌加鹽耗  
賣價緣由理合恭摺具陳伏乞

皇上聖鑒訓示謹

奏



庶課奏銷展緩摺

同治十三年四月二十七日

奏爲撥案請緩長蘆本屆正課奏銷以卹商艱恭摺仰祈

聖鑒事竊據長蘆通綱商人呈稱自同治十年被水後兩次展緩正課原冀年歲豐稔銀價稍減成木不致大虧徵收漸復舊限無如上年又被水災生鹽短絀銀價無減仍多賠折轉瞬五月奏限商力不支懇將本屆正課緩至十一月完納當以該商等所稟尙屬實情但課餉要需礙難緩至十月以後批行運司察酌妥議詳辦茲據該運使覺羅成孚詳稱蘆商正課餉需攸關如可周轉萬不容稍有延緩惟商情本已疲乏連年疊被水災本重銀貴元氣未舒苦累殊甚上屆正課尾欠及未解帑利均須趕緊催徵春運逾時資本尙缺若將正課照舊奏銷則課運同時並籌勢必顧此失彼體察情形實難遽復舊限擬照上兩年成案將本屆應徵正

課奏銷緩至十月等情請奏前來。查該運司所議係爲體卹商艱兼顧課款起見。上兩屆奏請展緩均奉

旨允准。而應撥京奉各餉仍係年內湊解清款尙無貽誤相應額

懇天恩俯念蘆商災困未紓。在將同治十三年正課奏銷照案緩至十月辦理屆時仍由臣督飭運司實力催徵無誤。額撥京奉各餉以期兼顧理合恭摺具陳伏乞皇上聖鑒訓示。敕部知照謹

奏

海防支應報銷摺

同治十三年四月十七日

奏爲查明天津海防支應局十二年分收支餉需按款分造清冊

請

旨敕部核銷恭摺仰祈

聖鑒事竊據天津支應局司道會詳津郡辦理海防原練續練新  
練之洋鎗礮隊挑練馬隊通永鎮大沽協等營馬步官兵雲字營  
馬隊暨調防歸綏直字營馬勇餉乾等銀向於津海關六成洋稅  
洋藥釐捐東海關協餉長蘆鹽斤復價甯河釐捐各項下隨時籌  
撥按照歷辦章程樽節支放所有同治十一年分收支款目造冊  
詳經奏咨准銷在案嗣因十二年分係有同之年月餉不敷復截  
留江蘇海關匯解保定練餉局銀三萬兩添發閏月餉需並查派  
赴科布多教習隊伍弁兵於是年四月二十三日先將外委一員

兵二名撤回歸隊應支底餉薪水口分於回津日分別截止接支  
又奏准津郡洋鎗礮隊照直隸練軍步隊營制改爲四營三哨以  
節餉需於六月初一日一律改設該營原領月餉除撥駐大沽海  
口礮臺官四十八員兵七百名仍照舊章支領外其四營三哨卽  
照練軍章程核支洋馬大馬暨挑練馬隊馬乾總統隨帶文武員  
弁並鎗礮公費一併刪除京營教習官弁五員飭回原營差遣薪  
水馬乾於六月底截止又於原練洋礮內挑選開花礮三十尊撥  
照大沽礮臺演礮經費准銷成案每月酌給用費銀三兩六  
錢又津郡濱臨大海朔風颭勁該兵勇冬令巡夜寒苦異常向例  
夏冬兩季每名每月給衣帽銀二兩五錢茲裁去夏季酌留冬季  
每名核減銀一錢五分實支銀二兩二錢五分又練兵底餉應由  
藩司扣出概交統領與練餉一併支發又津郡五方雜處恐外來

游匪散勇溷跡滋事派營務處武職人員謹夜稽查每月加津  
貼銀三兩自五月初一日起支又因教練隊伍添設外洋緝譯官  
一員月給薪水銀一百兩自十一月初一日起支其從前派赴科  
城教習尙有無底餉弁勇五名仍按季比照戰糧每名月給銀一  
兩三錢以資養贍家屬調防歸綏之直字前後兩營馬隊及津標  
洋礮隊所加餉乾等項按三箇月撥解一次又天津營務處爲諸  
軍總匯派候補道員會同總理該處差遣文武並辦理通商文案  
及經理鹹水沽稻田委員應支薪水均照章按月核給又海防支  
應局事務繁多添派道員會辦現將收支各款截清日期造具細  
數清冊詳請

奏咨前來臣遂加覆核計自同治十二年正月初一日起截至十  
二月三十日止共收過津海關洋稅洋藥釐捐東海關協餉釐鹽

復價甯河釐捐並截留保定練餉等項銀四十二萬五千二百八十七兩五錢四釐一毫共支過官兵勇隊薪水口糧俸廉餉乾公費柴草及現任各官借支預廉委員薪水聽差護局夫勇渡夫工價米折口糧看守藥庫弁兵薪水口分洋鎗礮隊並挑練馬隊公費改設練軍洋礮用費海口礮臺演礮經費兵丁衣帽棺木建築軍械所庫房礮棚並歲修大沽礮臺兵房練軍營盤估用民地酌給租價添製帳房旗幟號符及一切軍火子藥等項運送軍火委員盤費騾腳局書工食油燭紙張租賃民房等項遵照部定章程應請戶部核銷銀三十六萬七千八百五兩五錢二分七釐二毫三絲二忽工部核銷銀五萬九千七百二十八兩三錢一分二釐二毫五絲三忽二微二共應銷銀四十二萬六千八百一十三兩八錢三分九釐四毫八絲五忽二微內除本案內扣收平餘銀五

百九十七兩五錢四分二釐七毫二絲二忽五微儘數動支外計  
不敷墊支銀九百二十八兩七錢九分二釐六毫六絲二忽七微  
均係隨時籌墊並承辦各員請領未發之款俟准部覆後再行分  
別辦理除清冊咨部查照外所有查明海防收支餉需銀造冊請  
銷緣由理合恭摺具

奏伏乞

皇上聖鑒敕部核銷謹

奏

旗租撥協奉賑摺

同治十三年五月初六日

奏爲部撥直隸旗租協濟奉省賑需現已竭力湊撥銀一萬兩其餘無可再籌擬請改撥恭摺仰祈

聖鑒事竊准戶部咨開奉天上年被水成災應需賑濟銀兩奏請於直隸旗租項下撥給銀三萬兩等因奉

旨依議欽此遵卽督同藩司妥速籌議伏查直隸旗租除順天府屬徑解部庫外其應徵解司庫者每年共二十八萬餘兩內除蠲緩民欠實在徵解到司僅十五六萬至十七八萬兩不等而年例指撥旗租各款如

東陵舊欠米折十四駐防新案米折永定南運北運三河歲搶修經費東三省俸餉新疆協餉順天府辦硝價銀每年必需銀二十二三萬兩皆係刻不容緩以入抵出計尙不敷銀五六萬兩此外



並有奉部隨時指撥之款歷經設法借墊迄今已墊過銀四十四萬餘兩直隸本係缺額省分近年災區極廣司庫入款更不如前

而出款則萬不能少加以兩次恭辦

陵差用費增鉅現在非特無從再墊卽前墊之四十四萬餘兩尙須分別籌還以應各本款支用部臣似未深悉支絀情形一至於此故爲此發棠之請因奉省賑需緊要姑飭藩司竭力措墊已於萬難中暫行湊借銀一萬兩派員會同該省來員迅速起解其餘二萬兩實係無可再籌直省連年災賑之需皆仰給他省撥助其未能於旗租項下稍資挹注可爲明證且旗租收不敷放部中按籍而稽盈絀無難立見相應仰懇天恩俯念直隸庫儲極絀奉省待賑孔殷將下餘銀二萬兩敕部迅速改撥以免延誤理合恭摺具陳伏乞

皇上聖鑒訓示謹  
奏

機器局勦用經費

同治十三年五月初六日

奏為天津機器局同治十一年分勦用經費各款撥案開單

奏報恭摺具陳仰祈

聖鑒事竊查天津機器局經費係奏明勦撥海關四成洋稅作正開銷截至同治十年分止業經督飭局員將支銷款目查照前三口通商大臣崇厚等辦過成案開列簡明清單具奏十一年十月初二日奉

旨該衙門知道單併發等因欽此欽遵在案該局總理諸務先由湖北補用道沈保靖與津海關道陳欽會辦嗣沈保靖擢任九江關道經奏調廣東補用道吳贊誠來津接辦該員向在粵東留心洋務旋改留直隸與陳欽一意講求整頓開拓頗收成效十一年春間該局乘積水涸退培修舊廠接築土隄所建鑄鐵熟鐵鉛

木等廠先後竣工添購西洋藥碾三分於十二年四月到齊並購到各式機器十餘具續建新機器房及第二座碾藥廠同時告竣依式安配其餘兩分藥碾應建廠座備齊物料次第動工造出洋火藥銅帽子彈等項較前增多兩倍撥給直防淮練各軍及奉天熱河關外征防諸軍要需隨時應付無誤臣逐加試驗均屬精利合用與外洋軍火無別所造挖河機器亦靈便如法其餘製成器具均歸本廠及各營領用該道等督飭中外匠役實力工作苦心研究數年以來技藝漸多嫻熟製造日起有功原設城南海光寺鑄鐵廠移併本廠復在滄口地方購地五十九畝建成洋式藥庫三座環以濠牆足備久遠統計添建廠庫二百餘間增築護隄一千餘丈儲材積料墊道培基措置俱中肯綮茲據該道等詳稱該局動用款項上屆報銷案內尚餘銀一萬二千五百六十六兩六

錢二分三釐六毫八絲八忽物料約值銀五萬數千兩該局陸續由關庫四成洋稅項下領過銀三十九萬五千二百六十九兩九錢三分二釐三毫五絲八忽共計兩年連開二十五箇月支用銀三十九萬四千七百兩三錢八分六毫九絲三忽仍存銀一萬八千二百十八兩二錢四分九釐六毫五絲三忽尙餘一切物料約值銀五萬數千兩連年增雇匠徒寬儲料物清付器價興造廠工又以十一十二兩年疊被水浸培廠築隄設法防護工需浩繁皆必不可省之費動用銀款均係極力樽節實事求是毫無浮冒製造仿用西法變換不常物料來自外洋名目互異實無例價可循未能劃一造報懇仍按照成案開單請銷會詳請奏前來臣查道員沈保靖吳贊誠先後經理局務與津海關道陳欽商權妥辦臣就近督率隨時稽查該員等均能嚴明約束核實旬稽且於遞年

水患之中設法營護力求精進俾工藝益臻起色所需經費以購辦外洋機器物料爲大宗卽中外員匠夫役薪費無不事事節省據詳各節委係實在情形並無絲毫冒濫相應援照向章繕具簡明清單恭呈

御覽合無仰懇

天恩敕部查照成案照單准銷實於局務有裨除分咨總理各國事務衙門戶工二部知照外所有天津機器局同治十一十二年分動用經費據實開單緣由理合恭摺具陳伏乞

皇上聖鑒訓示謹

奏

謹將天津機器局同治十一年正月起到十二年十二月止  
收支各項銀兩分別款目繕具簡明清單恭呈

御覽

計開

舊管項下

一原存庫平銀一萬二千五百六十六兩六錢二分三釐六毫八

絲八忽

新收項下

一收津海關陸續移撥四成洋稅庫平銀三十九萬五千二百六十九兩九錢三分二釐三毫五絲八忽

一收前總理洋人密安士繳回棧房價及各國修船等費庫平銀五千八十二兩七分四釐三毫

以上共收庫平銀四十萬三百五十二兩六釐六毫五絲八

忽

開除項下

一給發采買外洋銅鐵鋼鉛木植煤炭硝磺漆油鐵水雜物及起運器料公司保險輪帆各船腳價等項庫平銀十三萬五千六百四十兩五錢一分四釐五毫四絲四忽

一給發仿照外洋廠屋藥庫挖濠墊土起隄各工并購置外洋松木鐵轍火泥及缸磚瓦石等項庫平銀五萬五千九百七兩三錢八分六釐七毫一絲五忽

一給發清付前購藥碾銅帽捲銅皮機器續購鐵車鑼床機器定購六角稿餅藥機器等價及洋行墊本利銀公司保險等項庫平銀七萬二百六十二兩二錢九分六釐三毫一絲四忽



一給發員弁司事人等薪水心紅紙張等項庫平銀二萬七千一百十二兩三錢三分三釐一毫九絲八忽

一給發各廠洋匠薪水工食醫藥并期滿遣回盤費等項庫平銀四萬六千一百八十九兩二錢四分八絲二忽

一給發仿照外洋機器火藥銅帽銅礮工匠學徒夫役及墊道修塼土夫各工食等項庫平銀五萬六千九百七兩八錢九分五釐九毫四絲

一給發行營製造局支撥外洋物料等項庫平銀二千六百八十九兩七錢一分三釐九毫

以上共支庫平銀三十九萬四千七百兩三錢八分六毫九

絲三忽

實在項下

一存庫平銀一萬八千二百十八兩二錢四分九釐六毫五絲三

忽

祕魯商約定議摺

同治十三年五月十三日

奏爲欽遵

諭旨與祕魯使臣議立專條並通商條約現已議定會同畫押鈐印恭摺覆陳仰祈

聖鑒事竊祕魯國使臣葛爾西耶於上年九月初開由日本來津求立和約臣疊與辨駁該使赴京度歲本年三月臣回駐天津該使復來饒舌經臣先後

奏明在案欽奉三月二十九日

上諭已另有旨派李鴻章爲全權大臣與該國使臣會商事務祕魯前有虐待華工之事務與之辨諭明晰先立專條再議通商條約本日簡派全權大臣諭旨一道一併發往如該使臣索看憑據著另行恭錄給與閱看俟議辦事畢此旨仍繳還軍機處備查等

因欽此先是英國使臣威安瑪履向總理衙門及臣處代爲關說  
葛爾西耶今春來津威安瑪復遣英國漢文正使梅輝立同來會  
商臣堅持初議必先訂立查辦華工章程方可徐議通商條款隨  
與葛使將查辦華工受苦者應由祕國自行出資送回逐層辨論  
卽擬就委員查辦專條照上年送去章程稍加變通派員與梅輝  
立再三駁改而後定爲使已無異議梅輝立亦卽回京該使旋請  
立通商條款先自采取西國各約彙成五十一款而交閱看臣未  
准接收當片酌擬簡明二十款該使深不謂然仍將前款刪減送  
閱因與逐條逐句參稽辨難擇其無關緊要者允訂數條而相離  
甚遠彼此相持不下暫令津海關道陳欽候補道孫士遠與其副  
使愛勒謨爾會議乃疊經晤商該副使狡執異常陳欽等亦弗稍  
遷就葛使又函請約期與臣面議四月二十六二十八等日竭力

商辦該使必欲援照各國和約通例不肯一語放鬆並稱現為此  
事已在中國耽擱七月有餘實係不能再住今所議無成只有即  
日回國將近日會議各情布告各國公評曲直其意似甚決絕二  
十九日探聞該使白出傳單知會駐津各國領事算帳告辭適臣  
處洋務委員與該領事等剖陳原委謂請不在我一聽客之所為  
美國領事施博法國領事林椿皆願從旁調處五月初一日美領  
事來晤謂與葛使詳悉開導必照美國續約第五款不准招工杜  
絕後患則其餘各條應可仿照各國和約辦理法領事又請道員  
孫士達至寓與祕魯副使愛勒漢爾當面熟商約定初三日葛使  
再來臣等會晤是日彼此辨議三時之久遂將通商條約十九款  
及已訂查辦專條逐加改定趕緊譯出漢洋文正副本校對無訛  
即於五月十三日在公所會同畫押鈐印竣事彼此各存一分以

備屆期互換在葛使之意與各國公論彼既允定查辦查造華工專條是祕約已予中國以便宜我亦當照西國各約允以一律現定通商條約除經刪去傳教招工兩條不准闖入外其十九款內多與西約詞意略同然亦酌量添改如第四款領事必須真正官員不得委商人代理第五款游歷執照如運貨物應照報單章程辦理至遣使通商納稅兵船詞訟各節均先將中國一而敘列皆以防流弊而維體制也所最要者招工弊端百出華人受害獨深而澳門界不中不外之交素為拐匪淵藪大西洋雖已出示禁止聞近日復有潛行販運之事祕約有華工十萬餘人無非自澳門陸續販往該民既在祕國受苦以前雖允查辦以後若仍開招患將何所底止茲與會訂第六款上半節照美國續約載明除兩國人民自願往來居住外別有招致之法均非所准下復添敘不

准在澳門及各口岸勉強誘騙中國人運載出洋違者其人從嚴懲治船隻按例罰辦等語臣爲此條反覆爭論幾於舌敝唇焦至往復數十次該使始勉強允嗣後尤望內外各衙門壹意堅持照約嚴禁將來或值修改章程仍須重申禁令力杜覬覦庶可保民命而肅政體耳竊查上年六月開總理衙門照覆英法各國祕轉專以拐販華工爲事必將所招華工送回中國並聲明不准招工方能商議立約等語實屬詞嚴義正其時各國使臣方謂礙難遵辦卽祕轉使臣初至津時亦甚桀驁不服茲經總理衙門與臣設法磋商恪遵

聖訓先立查辦查遺專條查明委員往查受苦者由祕國備船查送是卽總理衙門原議送回華工之意通商條約第六款所載亦卽總理衙門原議不准招工方與立約之意差幸前言之適符實

臣初料所不及臣因所訂專條寫使必添敘

批准互交等語恐其日後或有翻覆前令委員前往立可照辦該使允即遵照咨會該國並備照會存案除將存留條約及專條一分祕傳照會一件備文封送軍機處代為進呈

御覽所有欽奉全權大臣

諭旨一道另行敬謹封固咨繳軍機處備查並咨總理各國事務衙門知照外所有會議祕傳國查辦專條及通商條約竣事緣由理合繕摺出驛覆陳伏乞

皇上聖鑒訓示施行謹

奏



張家口糧臺請部餉摺  
同治十三年五月二十三日

奏為張家口糧臺懇

恩照案續撥部餉恭摺仰祈

聖鑒事竊查前因烏里雅蘇臺等處調兵防剿遵

旨張家口設立糧臺辦運各路軍糧奏明請撥部餉以資接濟

三年以來先後由臣六次奏撥部餉銀十八萬兩飭委口北道分

起辦運並於十二年底截數造報在案茲據口北道奎斌稟稱

報銷案內存銀二萬三千四百一十五兩零茲已運過駐紮烏里

雅蘇臺之察哈爾各起並吉林黑龍江官兵同治十三年春夏二

季米三千七百九十餘石又運駐紮庫倫之宣化古北口練軍米

麪四千二百餘袋統共用過米價繩袋運腳並委員薪水雜支等

項銀二萬一千三百餘兩現在僅存銀二千兩有奇查庫倫米麪

接續運發並無間斷烏城秋冬之糧轉瞬卽須馳進自應趕早購辦以備起運惟現存之款不敷支用請速奏撥等情前來臣查該道所稟委係實情相應仰懇

天恩敕下戶部照案續撥餉銀三萬兩仍由順天府尹就近派員領解赴張家口糧臺交收以濟要需所有張家口糧臺請照案撥餉部餉緣由理合恭摺具陳伏乞

皇上聖訓示謹

奏

派隊航海防禦摺  
同治十三年六月初十日

奏爲遵

旨籌派洋鎗隊航海馳赴臺防並請調駐陝銘軍東來以備南北  
海口策應恭摺密陳仰祈

聖鑒事竊臣欽奉同治十三年六月初八日

寄諭著由北洋大臣調撥洋鎗隊三千人南洋大臣調撥二千人  
均乘坐輪船赴臺該郡現有兵勇不甚得力李鴻章李宗羲務當  
迅速調派令其剋期起程前往等因欽此仰見

皇上慎固海疆整軍馭遠

聖謨廣運欽佩莫名伏查此次日本構兵生番焚掠牡丹等社實  
屬顯違和約妄啟釁端經沈葆楨派令藩司潘蔚等親赴琅瑯與  
該中將西鄉從道據理駁詰該酋猶復藉詞狡展未肯遵照撤兵

居心殊為巨測臺灣水陸兵備自不可不厚集其勢預伐詭謀惟  
沈葆楨原奏請由北洋借撥久練洋鎗隊三千南洋二千直隸  
大枝防軍現只廣西右江鎮總兵周盛傳所統盛仁等營正在大  
沽海口以內修造新城添築礮臺工尙未竣

畿輔重地必須留備緩急礙難分調南洋鎗隊無多分駐金陵蘇  
揚上海等處防務緊要亦難酌撥且兵勢聚則氣盛分則力弱若  
於兩處零星抽撥兵將素不相習轉恐臨敵貽誤臣處督淮沈葆  
楨面咨臺灣現辦情形先經與兩江督臣李宗義江蘇撫臣張樹  
聲往返緘商臣有記名提督唐定奎所統現駐徐州之武毅銘字  
一軍向隸提督劉銘傳部下隨臣勦辦擬捻轉戰數省極為得力  
唐定奎樸誠明幹素為將士所服臣於同治十年九月內奏報曹  
克忠赴陝接統銘軍摺內詳明撥交臣下營外餘仍拔回徐州屯

駐以備南北援應。將此軍可備征調情形。面覆沈葆楨暨總理衙門。查照該大臣此次陳奏。自係尚未接准前函。現在臺灣需兵設防。應仍移緩就急。力顧大局。擬即飛飭唐定奎統帶所部步隊十三營。合計六千五百人。由徐拔赴瓜洲口。分批航海赴臺聽候沈葆楨調遣。該軍向由西洋鎗礮訓練。有年。步伐整齊。技藝嫻熟。將士一心。尙可資指臂之助。其提督陳鳳樓所帶該軍馬隊三營一哨。仍暫留徐州宿遷巡緝地方。臣一面商請李宗義等飭調滬局輪船暨雇用招商局輪船。駛赴瓜洲。分起裝載東渡。委令道員盛宣懷往來照料。並緘請沈葆楨酌派閩廠兵船入江。接載俾期迅速。該軍所需月餉軍裝子藥等項。督飭後路臺局源源籌濟。不令稍有缺乏。至彭楚漢前奉

諭旨飭赴本任籌辦福州等處海防。月內交卸來津。即令遵

行剋日赴任唐定奎一軍口可無庸再令彭楚漢統帶以免紛歧  
再欽奉五月三十日

密諭各省沿海口岸甚多亟應一體設防聯絡聲勢以期有備無  
患著臣等統籌全局悉心會商布置等因竊念日本積番拓地悍  
不旋師恐是中外構亂之始無論蘇浙江海各口防兵單薄即北  
洋二千餘里口岸林立亦多空虛若另募新軍實在無此餉力惟  
有添調久練勁旅屯紮後路適中之地以壯聲援查甘省現早肅  
清陝境防務已鬆擬請

旨敕下陝西撫臣速飭記名臬司劉盛藻統率陝防武毅銘軍馬  
步二十二營星夜兼程拔赴山東濟甯及江南徐州一帶擇要駐  
扼以備南北海口策應由臣會商李宗羲相機調派除直隸應辦  
海防隨時妥籌具奏外所有籌派洋鎗隊航海馳赴陝防並請調

駐陝銘軍緣由理合恭摺由驛六百里密陳伏乞  
皇上聖鑒訓示謹

奏

彭楚漢交卸赴閩片

同治十三年六月初十日

再臣欽奉同治十三年五月二十七日

上諭福州各處海口關繫緊要防守需人福建水師提督彭楚漢前經李鴻章奏請留帶直隸練軍刻下閩省防務正急著李鴻章卽飭彭楚漢剋日馳赴新任以重地方直隸練軍卽由該督另揀委員統帶等因欽此當卽恭錄轉行欽遵知照查本任大名鎮總兵徐道奎現帶水師親兵營駐紮天津經臣飭令督率弁勇在津郡三岔河口北岸建築礮臺脩立營壘以扼由津赴京水路海防緊要未便遽易生手惟查有記名提督許保清老成幹練曉暢機宜堪勝專閩之任業由臣檄飭前往署理大名鎮總兵篆務並接統該鎮原帶馬步練軍以資整頓除俟彭楚漢交卸到津卽令剋日航海赴閩外理合附片覆陳伏乞



聖諭

奏

夾板印封仍由驛遞片

同治十三年六月初十日

再疊奉

寄諭沈葆楨及文煜李鶴年夾板印封等件由臣發交輪船速爲分別投遞遵查五月二十五日

寄諭夾板文件當交沈葆楨齎摺千總鄭漁原輪船齎回五月二十七三十等日夾板印封各件適有招商局輪船運糧來津卽發交該船帶至上海飭由江海關道沈秉成專弁搭輪遞閩分別轉投當不致誤惟查天津僅有駐防輪船二隻一係滬局操江船前因船身損壞回滬脩整暫難北來一係奏調閩局之鎮海船現今專防要地未便遠離所奉夾板文件實無官船可遞目下招商輪船漕米運竣來津甚稀若搭洋商輪船究恐展轉貽誤況查由原五六百里驛遞至閩不過十五六日而輪船由津至滬須五六日

又由滬至閩須三四日至速僅早到數日耳若無便船往往候過兼旬卽如臣於五月初二三日商覆沈葆楨調兵之函由商輪轉寄昨沈葆楨五月二十一日發信尙未接到是輪船遲速無常確有明證擬請嗣後

寄諭夾板等件除發交府摺原輪船遞回可期迅速外其餘似應仍由驛遞發閩省庶昭慎重而免遲誤是否有當伏乞

聖鑒訓示謹附片具奏

匪徒仍就地懲辦摺

同治十三年六月十六日

奏爲直隸擊獲梟匪土匪馬賊等犯請仍照奏定章程就地懲辦恭摺仰祈

聖鑒事竊准刑部咨開議擬御史鄧慶麟奏軍務肅清省分擊獲盜匪請照舊例辦理一摺各省軍務雖已肅清盜風尙未止息全在地方官認真搜捕從權辦理若遽由部改歸舊制恐窒礙難行轉非綏靖地方之意請

敕下各省體察情形妥議具奏等因奉

旨依議欽此並准府尹臣咨會核奏前來當經督同按察使范梁體察情形詳確妥議伏查同治八年前督臣曾國藩奏奉

上諭嗣後直隸擊獲梟匪土匪擾害鄉里橫行搶劫勒索資財以及騎馬持械倚強肆掠兇暴眾著降捻游勇聚黨夥劫仍照歷次

奏定章程由地方官審訊明確稟明督撫批飭該管府州親往覆訊後卽行就地正法等因欽遵在案直屬大名廣平一帶與豫東接壤素多匪徒出沒永遠宣化及順天近邊之區口外馬賊常有往來窺伺天河二府向患梟匪深冀等屬並正定近山地面民俗强悍往往游手數十人結聚爲梟路劫糾搶之案所在皆有況大亂初平人心易於煽動捕治非嚴速不可疊飭地方官及防練各軍實力巡緝凡拏獲尋常盜犯皆係照例解勘其梟匪土匪馬賊等犯照章批飭本管府州親往覆訊就地正法其中或疊劫多案或劫財而又殺傷事主焚毀房屋掠擄人口抗拒官兵均屬兇暴異常難稽顯戮卽如現據靈壽縣報獲盜匪康洛照等六名與逸盜梁四小等強劫縣民家財傷人毀屋復拿夥輪姦婦女此等窮兇極惡之徒儻必照常解勘迨准部覆始在省垣處決則鄉民惟

見其犯法不得見其伏誅實無以洩眾忿而在途在獄疏失之虞與解宥恃無質證狡翻牽累更無論矣豈定例強盜但得財者不分首從皆斬若就地正法不過懲辦較速於罪名並無出入且須賊證明確又經府州覆訊辦理已屬詳慎人命不至枉誣直隸爲畿輔重地兵燹災歉之餘尤慮勾結宕延釀成巨患速正盜劫之罪卽所以保全良懦剷除亂萌一時礙難遽復舊制臣悉心酌核除尋常盜犯應仍照例解勘外其梟匪土匪馬賊或降眾游勇恃強糾劫者應仍遵同治八年欽奉

諭旨辦理以昭炯戒而靖地方亦與定例並行不悖所有直省匪徒仍請照章懲辦緣由理合會同兼管順天府府尹臣萬壽黎順天府府尹臣彭祖賢恭摺陳伏乞

皇上聖鑒敕部知照謹

矣

楊鼎勳祀曾祠片

同治十三年六月十六日

再據天津紳士頭品頂戴前浙江布政使沈兆澐等聯名呈稱同治七年張總愚捻股由晉冀直逆徽鴟張津郡地處要衝勢甚岌岌幸總統勅軍前湖南提督楊鼎勳會同郭松林潘鼎新等星夜馳援復扼堵滄州滅河賊始不敢渡河北竄卒就殲擒津民乃有更生之慶合郡賴以保全紳民至今感慕今滄州既經建祠而津郡未申報享擬請祀前督臣曾國藩天津專祠以慰士民之望等情請奏前來臣查楊鼎勳自咸豐初年從軍以來疊於鄂皖蘇浙閩等省帶勇立功洵推提督經前督臣曾國藩調赴山東勦擒蕩平任賴巨股同治七年春間舊傷舉發仍力疾追賊直隸饒陽等處疊著戰功是年四月間經臣飭派統軍馳援津郡辦理滄州滅河防務力堵北竄京畿之路旋因傷重歿於營次奏奉七年六



月二十五日

上諭楊鼎勳馳赴津郡辦理減河防勦諸臻妥協茲積勞在營病故殊堪憫惜著照提督軍營病故例從優議卹准於立功地方建立專祠等因欽此是該提督保障天津早邀

聖鑒滄州地方業經前通商大臣崇厚奏准建祠津郡亦係該提督立功之地現津郡建立前督臣曾國藩專祠既據該紳士等合詞呈請祀出於至誠合無仰懇

天恩俯准將前湖南提督楊鼎勳祀前督臣曾國藩專祠山地方官春秋致祭以彰忠績而順輿情理合附片具陳伏乞

聖鑒訓示謹

奏

李光昭報效木植結訟摺

同治十三年七月初三日

奏爲李光昭報效木植現與洋人互控結訟膠轕甚多一時無從  
驗收轉解恭摺仰祈

聖鑒事竊前准內務府咨開候選知府李光昭報效木植請免稅  
放行迅速派員解京一摺奉

旨依議欽此鈔錄原奏及李光昭稟稿咨行到臣遵卽劄委署津

海關道孫士達會同天津道丁壽昌遴派候補同知宋寶華候補

縣丞馬宗武前赴新關驗收運到木植六月二十日據美國署領

事官畢德格申稱據美國旗昌行商人稟稱在福州與李光昭議

買法商木植三載一抵天津一抵上海一仍在外國共議定價值

洋銀五萬四千二百五十元言明到津付價取貨若有耽延每日

加船價費用洋銀五十元現到一船在津耽延三十三日應加洋

銀一千六百五十元除收過李光昭定銀十元此船尙欠洋一萬五千零八十六元零李光昭尙未付價未便付給木植並鈔呈原定合同等情卽轉行該關道等速催李光昭與洋商清算帳目旋據李光昭到津赴道稟稱洋商運到木植尺寸與原議不符請照會領事飭該商將大木尺寸呈出底單具限速運來津該關道正在照催美法領事查辦二十六日接據美國領事申稱李光昭不肯收木付價因木商係法國人令其前往法領事處控告日後此案卽歸法領事辦理是日又據法國領事官狄隆照會關道以該法商與李光昭交手事件未清惟恐李光昭逃走稟請設法拘留復經該關道孫士達照覆法領事謂李光昭定購法商播威利木植立有合同該商未照合同將各項蔽明碼數木植運到以致不合工需屬將後載木單給閱彼此公平成交二十八日又據法

領事照會關道以此案本擬秉公會審茲關道據李光昭一面之詞卽以法人理短胸有成見只可另行控辦等情又經該關道詳晰辨駁去後七月初二日通永道英良由京到津恭傳

皇上面諭飭臣將運到木植趕緊解京應用等因欽此跪聆之下亟應懷遵妥速籌辦惟查李光昭與法美領事各執一詞在李光昭謂現到之木尺寸短小與原議不符未便收木付價致不合用在法國商人堅稱木料尺寸與合同相符李光昭藉詞指價控請領事會審仍欲另行控辦是其中軋輻甚多必須關道與領事官秉公會審明確方能定讞且李光昭與洋商原立合同內僅付過定銀十元並據美領事申稱洋木三載共只洋銀五萬四千餘元又耽延加銀一千六百餘元而李光昭在內務府呈稱購運洋木報效值銀三十萬兩木價既浮開太多銀兩亦分毫未付所謂報

效者何在又五月間赴津關報稱木船兩載迄今只到一船種種  
虛浮實難憑信事關洋商控案各領事從中把持應俟木船到齊  
李光昭與之清算了結始能詳細驗收設法解運謹將美領事申  
陳臣處兩函並鈔李光昭與洋商合同一紙法領事照會津海關  
道原文兩件一併鈔呈  
御覽除咨明總理各國事務衙門內務府知照外合先據實專摺  
覆陳伏乞

皇上聖鑒訓示謹

奏

海防請借川餉摺 同治十三年七月二十一日

奏爲海防緊要餉需支絀請

旨飭催川餉俾資接濟恭摺仰祈

聖鑒事竊臣前因督師赴陝援剿於同治九年四月內奏請

敕下四川督臣按月籌撥臣營餉銀三萬兩嗣因該省未能按期

籌解復於是年十月內奏請

飭催疊蒙

聖鑒在案計自九年五月起截至本年四月止疊准陸續解過協

餉二十批共銀六十九萬兩按月核計所解不及一半臣軍自九

年秋間調隨赴直拱衛

畿輔復分防陝西邠乾江蘇徐揚湖北襄陽等處皆就現有餉力

勉強措拮實已竭蹶不遑近因日本構兵生番盪防孔亟遵

旨奏派徐州銘軍航海赴臺復調陝防銘軍撤回徐州濟甯一帶扼要屯紮以備南北海口策應軍行數千里在在需費不貲而津郡新城海口各礮臺修築甫竣舊存礮位全不利用若無礮與無臺等計須添購西洋新式大小後膛礮數百尊估費約二百餘萬兩

京畿門戶重地各國之所窺伺東洋之所覬覦聲勢不可不壯而巨款一無可措焦急莫名至軍分顧數省防務從前奏定協餉江蘇湖北尙能照章勉力湊解浙江續請減撥每年僅解銀六萬兩現在東南各省籌辦海防江防添營置械用款倍增只求額餉不再減短勢難另請添撥惟四川居偏隅腹地財力雖非有餘值此時艱各路協餉實無如海防之急且要者自應移緩就急其維大局且軍餉撥按月三萬本係有著的餉惟有籲懇

天恩救下四川督臣查明欠解軍月餉無論何款先行提解二十萬兩以濟眉急嗣後仍令按月如數解足俾得陸續辦庶於畿輔海防要需稍有裨助所有請

旨飭催川餉緣由理合恭摺由驛具陳伏乞

皇上聖鑒訓示謹

奏



淮軍雜支請照核銷片 同治十三年七月二十一日

再准軍西征報銷一案經戶部議駁未遵例章開銷之柴草油燭銀兩未便核准等因臣查淮軍支給柴草油燭相沿已久奏明准銷已非一案自同治元年駐軍上海至四年以前柴草一項俱由地方籌捐采辦供支以免兵勇藉榷竊為名滋擾鄉村其油燭向支本色為巡更放哨必不可少之需迨調赴北省勦捻軍行無定州縣難於捐辦營經前督臣曾國藩與臣酌定折價銀兩飭令糧臺發給由營自行采辦歷屆准銷有案此次西征第一案仍係循案接造忽奉部議核刪謂於章程之外設立名目僅於報銷之前以一奏預為開銷地步等語查臣先於同治四年正月間調派提督郭松林等統松勦各軍航海援閩五月間又派藩司潘鼎新統鼎軍航海北援直東兩次

奏明軍向按各營人數月給柴薪油燭等項欽奉

諭旨著左宗棠等派員籌款就近采辦復經山東撫臣奏報按月

撥解潘鼎新軍營柴薪銀二千兩並非戶部咨飭收入軍需項下

報銷五年六月開河南撫臣奏督臣曾國藩調派湘淮各軍及吉

林黑龍江各起馬隊赴豫追剿經過州縣支應柴草米麩等項一

律作正開銷起抵該省協解曾國藩軍營月餉等因各在案是柴

草油燭固早有此項名目歷有奏案可稽實非於報銷前一奏預

爲開支地步十年五月間臣因西征用款內如柴草油燭等項爲

軍需例案所未備恪遵同治三年欽奉

諭旨奏明敕部立案所有勘掄軍需尾案報銷截至九年三月止

柴草油燭等項均經戶部核准並無飭令嗣後停止之語今西征

軍需用款係從九年四月起循案撥支並非捏造名目應在

聖明洞鑒之中現在矣調唐定奎所部銘軍赴臺灣協防疊准沈葆楨函稱擬令該軍暫紮鳳山縣境惟該處土人以煎渣代薪數十里內無可樵采必須籌款由內山購辦卽江蘇督撫臣商調劉盛藻所部分紮吳淞海口提督周盛傳所部駐防天津新城馬廠等處皆係無可樵采之地若不照章籌給采辦銀兩必至師不宿飽或藉端擾索百姓則貽害實非淺鮮臣極知

國家經費支絀事事務從撙節在部臣亦爲慎重軍儲起見惟臣久在行閒深知用兵情形今昔異宜如所費無多不得不隨時隨地酌量覈辦期於兵民相安未便盡執成例臣軍每營五百人月僅給柴草銀一百六十兩油燭銀三十兩費帑無幾而將帥得以力戒騷擾地方得以免生事端兵士得以預備炊爨所裨益於軍情者甚大若部議不惟報銷遇有徵調未免掣肘合無仰懇

特恩敕部將臣軍柴草油燭用款仍照前案核銷出自

逾格鴻慈伏乞

皇上聖鑒訓示謹附片具

奏請

旨

開濬陳家溝減河摺

同治十三年七月二十四日

奏爲開濬天津陳家溝河道並連東接開減河俾通省河流分由北塘歸海現已剋期辦竣恭摺仰祈

聖鑒事竊維直隸河道如永定河滹沱河大清河北運河南運河向稱五大河其旁支別派節節併注於五大河者又有六十餘河皆經天津三岔口由海河趨大沽而入海是天津實爲通省河道尾闕而專賴海河一道爲匯歸者也嘉道年間經費不支河已不能修治咸豐以後軍需繁巨各河淤廢益甚每遇積雨盛漲卽漫決爲災而海河灣曲旣多又復窄隘諸水爭赴不能容洩是以上游各河不免回流漫溢之虞臣幾經籌度若欲消除積患非上下游並治不可然各河淤廢太久工程太鉅近時帑藏支絀無此力量惟有先濬尾闕於三岔口迎上永定滹沱大清北運四大河交

匯之陳家溝迤東月開減河別道北塘海口以資分洩曾於上年  
統籌直隸河工以工代賑摺內陳明大略在案自秋徂冬陸續遴  
派候補道周馥天津道丁壽昌候補知府徐本衡隨營委員候選  
知府史克寬候選知縣王炳燮北河候補同知吳廷斌更番周歷  
相度測量自陳家溝起東至塌河淀繞淀之南邊出歡坨村經赤  
城灘循金鐘河淤平故道斜趨人薊運河至北塘歸海地勢直捷  
順利其自陳家溝至塌河淀邊計長三千七百餘丈本係舊河已  
極淤淺應一律開寬濬深其自塌河淀起至薊運河計長一萬四  
千一百餘丈係屬新開應挖口寬十丈至十五丈不等底寬七丈  
至十二丈不等深則漸下漸加自五尺至一丈不等均以挖出廢  
土堆於兩岸十丈以外藉作長隄約攔庶出槽可免旁溢通河修  
建橋梁五座以便商民往來其河身佔用民田一律酌給價值房

基墳墓資令遷移議定之後卽飭該道等畫界定誌估計土方並  
委員會同各該縣料理地價等事於是分定段落以陳家溝至塌  
河淀邊爲一大段派統帶津防練軍等營提督吳雲集督兵挑辦  
以塌河淀邊至薊運河新開河道分爲五大段派丁壽昌周馥史  
克寬徐本衡吳廷斌吳夫挑辦該提督與該道等各總一段之綱  
別調員弁分任其事自二月中旬起開段次第興作限以六月全  
完惟新開工段過長且係窪區尙有積水卽乾地挖下數尺水復  
上湧隨在開溝屏水方可施工迨五月中旬工未及半正值農忙  
之際大雨時行民夫難招漫水偏地其數葦之處不特水深盈尺  
且葦根盤錯利若鋒刃人難涉足該道等力爲其難懲勸兼施親  
率員弁兵夫一面疏堵水勢一面剷除荆棘復加勁催督併力趕  
辦據報於六月二十日全河開辦完竣臣卽委候補道吳贊誠前

往逐段查驗悉與原估丈尺相符河形通暢水勢直趨筋運河歸  
北塘入海已得建瓴之勢俟秋後水落察看情形有應加工者卽  
行補辦議定修守章程隨時認真經理毋使積久廢壞伏查開此  
減河如遇盛漲可分洩天津海河十之三四通省尾閘添此宣洩  
之路實於河道全局有裨若能逐漸籌出經費將上游各河次第  
挑築俾不至中道潰漫則水患可冀永除矣至該員等自開辦至  
今在工五月有餘於炎天烈日之下泥坑葦塘之中胼胝經營耐  
心艱苦爲之裂履爲之穿實屬勞勩倍常合無仰懇  
天恩准臣擇尤酌請獎敘以昭激勸所有天津陳家溝至北塘引  
河要工剋期辦竣緣由理合恭摺具陳伏乞

皇上聖鑒訓示謹

奏



部硝價腳分別捐補摺

同治十三年七月二十四日

奏爲直隸辦解部硝議將價腳等銀分別捐補開銷恭摺仰祈  
聖鑒事竊臣前奏部硝行取較多勢難盡歸捐辦擬量爲變通一  
摺准工部奏令妥議章程以歸畫一而濟要需等因奉

旨依議欽此遵卽督飭藩司孫觀安爲籌議茲據該司詳稱直隸  
州縣奉辦部硝向例每毛硝一斤銷價銀二分一釐九毫零合淨  
硝每斤價銀三分一釐三毫零在地糧項下撥給其不敷之數卽  
歸該州縣官民捐補然從前兩三年行取一批尙能勉力辦解自  
咸豐初年軍興以後漸增至一年一批甚至一年兩批行取既多  
捐數甚鉅且產硝州縣連年被水硝數奇絀而用處頻添以致硝  
斤居奇價益昂貴計近年時價購買淨硝一斤須價實銀一錢零  
甚至一錢五六分若按例價每斤銷銀三分一釐三毫零又按司

庫支發章程折給六成實銀每兩再扣去六分部平每斤只發實銀一分七釐有奇較之時價不及十分之二況復層疊派取官民力何能支查同治四年奉辦京師火藥局硝斤經前督臣劉長佑奏定每淨硝一斤在銷價銀一錢每百斤每百里腳價銀一錢以一百五十斤一包用席三領蔴繩三條席每領價銀八分繩每斤價銀三分七釐五毫概銷實銀在案今若全按時價開銷亦非所以節省經費應請將同治十一年奉取雙批硝斤照原議實令各屬兼辦一批價腳等銀循例報銷不敷之數仍由官民捐補其餘一批本係額外之項派捐萬難爲繼應援照同治四年辦硝奏准成案將價腳等項各按准銷定數以實銀作正開銷嗣後奉取雙批硝斤一律照辦如遇單批之年仍飭各屬照向例辦解庶官民賠累稍輕而要需亦不致貽誤等情詳覆前來臣查核所議章程

於量予體恤之中仍示限制以節經費尙屬妥協懇  
恩俯准照辦理合恭摺覆陳伏乞

皇上聖鑒敕部知照謹

奏

出借練餉制錢片 同治十三年七月二十四日

再南省解存天津練餉制錢除奏明借給江浙典商上海輪船招商局分領生息並借助京引商人復設公櫃資本外僅存五萬串據督銷直省蘆鹽懸岸委員候補知府楊嘉善以連年水災灘壘生鹽缺乏價值太昂商力益窘請借領練餉制錢赴沿海關東一帶采買生鹽平價濟運又據稽查豫省行銷蘆鹽委員河南候補知府邵增以豫省蘆鹽懸岸積弊太重將疲瘠者酌量歸官試辦逐漸整頓請借練餉制錢助本保商先後飭據長蘆運司成孚天津道丁壽昌核明於同治十二年十月初一日借給楊嘉善制錢三萬串又於十三年六月初一日借給邵增制錢二萬串均自借領之日起息各預繳一年息錢共三千五百串照章撥給盤運腳力錢五百串實繳三千串彙入賑款等項下撥用仍以三年爲限

照原領本錢五萬串如數歸款如限內提用應於三箇月內呈繳  
至練餉局委員書役前經奏明分別裁撤酌留所有一切文卷及  
嗣後收發息錢收還本錢事宜請歸併海防支應局兼辦仍酌留  
聽差四名月需工食將該局餘剩經費接續支發將來不敷再由  
支應局籌辦等情具詳前來臣覆核此次出借練餉制錢生息各  
節悉與戶部核准江浙典商借領章程相符其練餉局歸併支應  
局兼辦亦屬簡便除咨戶部外理合附片陳明伏乞

聖鑒謹

奏

輪船獲盜請獎摺

同治十三年七月二十四日

奏爲福建撥駐煙臺海口輪船在洋面拏獲鄰省全案盜犯請獎出力員弁恭摺仰祈

聖鑒事竊據東海關登萊青道龔易圖稟稱同治十二年九月十七日據奉天蓋州利豐和號商人趙鈺呈稱該號代客雇寫永豐財海船一隻裝載青豆四百餘石在蓋州連雲巖洋面守風九月初六夜間被賊連船帶貨劫去該商人即附輪船跟蹤前來呈請飭拏等情該道以該船被劫雖在奉天海口惟應不分畛域嚴速緝辦當即知會閩廠撥駐煙臺飛雲輪船管帶官吳世忠並派鎗隊開輪往拏追至海陽縣乳山口洋面即遇該船吳世忠率同大副林文和二副柯國棟等圍捕旋獲吳添四等十名續獲戴元等七名臨拏時勇丁林森躍船失足淹斃將各犯連原贓船貨送交

該道發據福山縣審明稟經山東撫臣飭將首犯吳添四夥犯吳連塘游開志黃羅等四犯先行就地正法梟示餘犯照例擬辦船貨給主領回在事員弁捕獲鄰省全案盜犯實屬奮勇妥速由該道擇尤擬請

奏獎前來臣查閩廠撥駐牛莊湄雲輪船前獲洋盜十餘名當以定章拏獲巨盜准保翎枝官階中國自製輪船在洋面捕盜得力尤應破格優獎將湄雲輪船管駕官屠宗年等請獎翎枝官階奉硃批屠宗年等均著照所請獎勵等因欽遵在案今飛雲輪船獲盜情事相同應請將管帶官保升參將福州湄州營游擊吳世忠以副將仍歸原省儘先補用大副都司銜林文和以都司用二副都司銜柯國棟以守備儘先補用仰懇

天恩俯准照獎以示鼓勵此外出力弁勇五名應獎千把等項容

臣咨部註册淹斃勇丁已飭該道籌款給賞所有輪船獲盜請獎  
員弁緣由理合會同署山東撫臣文彬恭摺具陳伏乞  
皇上聖鑒訓示謹  
奏



李文忠公奏稿卷二十三